

清  
異  
錄

一  
函  
四  
冊



三伏煦書檢得宋陶學士清異錄會友人結夏齋頭從  
惠重鋟相與披閱讐校聊作逃暑日課然原本漫漶烏  
焉帝虎觸目都是即別本亦大率踵譌襲繆尋行數墨  
間頗費料簡市月竣事用公世賞吾知讀是書者不必  
更索之諾臯津逮豈不較勝於兔園冊獮祭本乎按學  
士名穀字秀實小字鐵牛又號金鑾否人爲唐彥謙之  
孫避石晉諱改姓陶其本末詳史傳茲不具載古鹽官  
陳世修勉之氏追涼漱六閣下漫識

清異錄總目

天文門 十七事

地理門 十四事

君道門 十二事

官志門 十六事

人事門 十五事

女行門 凡五事

君子門 凡十事

么麼門 凡四事

釋族門 二十二事

僊宗門 凡六事

草木門 十五事

竹木門 十九事

百花門 二十六事

百菓門 三十八事

蔬菜門 二十五事

藥品門 二十事

禽名門 三十二事

獸名門 二十事

百蟲門 凡六事

魚門 凡三十三事

肢體門 凡八事

作用門 凡八事

居室門 二十四事

衣服門 二十五事

裝飾門 凡七事

陳設門 十四事

器具門 五十四事

文用門 二十六事

武器門 十一事

酒漿門 十六事

茗薺門 三十五事

饌羞門 三十九事

薰燎門 二十四事

喪葬門 凡九事

鬼門 一事

神門 二事

妖門 一事

清異錄總目終

清異錄

宋 陶穀撰

天文

龍潤

李煜在國時自作祈雨文曰尚垂龍潤之祥

跋扈將軍

隋煬帝泛舟忽陰風頗緊歎曰此風可謂跋扈將軍

奇水

雨無雲而降非龍而作號爲奇水

天公絮

雲者山川之氣今秦隴村民稱爲天公絮

赤真人

周季年東漢國大雪盛唱曰生怕赤真人都來一夜  
春後大宋受命

吼天氏

呂園貧秋深大風隣人朱錄事富而輕園後疊小帑  
擲園前云呂園洛師人也身寒而德備一日吼天氏  
作孽獨示威於園

聖琉璃

王衍伶官家樂侍燕小池水澄天見家樂應制云一  
段聖琉璃

艷陽根

偽閩中書吏韋添天宇謎云露頭更一日真是艷陽  
根

碧翁翁

晉出帝不善詩時爲俳諧語詠天詩曰高平上監碧

翁翁

地蓋

王彪天賦云溥爲地蓋浩作星衢

潤骨丹

開元時高太素隱商山起六逍遙館晴夏晚雲中秋  
午月冬日方出春雪未融暑簟清風夜階急雨各製  
一銘晚雲云作萬變圖先生一笑冬日云金鑪騰空

映簷白醉春雪云消除疫癘名潤骨丹清風云醒骨  
真人六月惠然

冷飛白

老伶官黃世明常言逮事莊宗大雪內宴鏡新磨進  
詞號冷飛白

天公玉戲

比邛清傳與一客同入湖南客曰凡雪僊人亦重之  
號天公玉戲

花韞扇

俗以開花風爲花韞扇潤花雨爲花沐浴至花老風  
雨斷送蓋花刑耳

驚世先生

驚世先生雷之聲也千里鏡電之形也

千里燭

道士王致一曰我平生不曾使一文油錢在家則為  
扇子燈出路則為千里燭意其日月也

迷空步障

世宗時水部郎韓彥卿使高麗卿有一書曰博學記  
偷抄之得三百餘事今抄天部七事迷空步障霧威

屑霜

教水露

冰子電

氣母虹

屑金星

秋明大老

天河

地理

黃金母

汾晉村野間語曰欲作千箱主問取黃金母意謂多稼厚畜由耕耘所致

空青府

契丹東丹王突買巧石數峰目爲空青府

圓光石

趙光逢奴往淮壩偶得一石四邊玲瓏類火光逢愛之名曰圓光石

隱士泥

秣陵孟娘山土正白色曰白塏土周護始調塗其四堵因呼隱士泥

寵僊

桑維翰壽辰韋潛德獻太湖石一塊上有鐫字金飾  
曰寵僊

琉璃變

劉東叔賦鴈月雨云且雨且凍山徑滑是誰作此琉  
璃變

四時節

桂林一日之間具四時之氣遷謫者惡之號為四時  
節

節木汴州

唐陵東南一都會凡百頗類京師號節木汴州

地上天宮

輕清秀麗東南爲甲富兼華夷餘杭又爲甲百事繁  
庶地上天宮也

青銅海

汴老圃紀生一鉏芘三十口病篤呼子孫戒曰此二  
十畝地便是青銅海也

七絃水

武夷山有石如立壁巔隱一泉分七派山僧顛堅名  
爲七絃水

小蓬萊

違命侯苑中鑿地廣一頃池心疊石象三神山號小  
蓬萊

麥家地理

臘雪熟麥春雪殺麥田翁以此占豐儉爲麥家地理

十辛

積麥以十辛良下子不得過三辛收發不得過三辛  
上塲入倉亦用辛日

君道

蕭閒大夫

劉張僭立奢麗自恣在宮中自稱蕭閒大夫

候窻監

南漢劉晟殿側置宮人望明窻以候曉宮人謂之候

窻監

仁爐義韜道薪德火

周杜良作唐太宗畫像贊云仁爐義韜道薪德火

摘爪手

人君號能用才者莫如唐太宗然瀛洲十八人許敬宗乃得與如摘爪手耳取之既多其中不容無濫

掃國真人

隋裴寂待選京都一日郊飲遇老人畫地上沙土曰掃國真人又曰玉環天子又曰兵丹上聖告寂云三百年中最雄者此三人耳寂醉卧及醒已失老人矣後人紬繹其名掃國者太宗之刻平僭暴也玉環太真妃子字玄宗以妃而召亂玉環天子是玄宗明矣

憲宗始以兵定方鎮之強終以丹躁滅身兵丹之目其憲宗之謂乎

避賢招難存三奉五皇帝

昭宗丁不可爲之時遭無所立之地人戲上尊號曰避賢招難存三奉五皇帝蓋帝常曰朕東西所至禍難隨之願避賢者路三謂三主帝后及楊柳昭儀五謂全忠行瑜克用茂貞韓建

彩局兒

開元中後宮繁衆侍御寢者難於取捨爲彩局兒以定之集宮嬪用骰子擲最勝一人乃得專夜宦璫私號骰子爲剉角媒人